

Zheng Yi Sao's Role in the Pirate Red Banner Fleet's Surrender in 1810:

鄭一嫂見郭婆帶之降而得官也。豔之亦稍自歛。思以就降。常曰：我衆十倍於郭。我若降。朝廷相待。豈止如郭者。然懼己負罪大。拒官多。懷疑未決。乃揚言於人曰：紅旗亦願降。冀官之聞而招之也。紫泥司章予之知之。乃命周飛熊往為間。以致之。周飛熊者。業醫澳門。頗識賊情。素有膽識。予之欲致賊降。募人作間。莫有應命。有薦其能者。遂命之往。熊見保曰：保哥。知我來意何如。保曰：汝避罪而投我乎。曰：非也。然則欲探聽我虛實乎。曰：亦非也。君自謂與婆

帶如何。保曰：婆帶馬敢比我。曰：既知婆帶不及君。今婆帶之降也。罪宥得官。君以十萬之衆。翕然歸降。則大人豈僅以把總相待耶。各官之喜君降。更甚於喜婆帶之降。不待智者而後知也。君誠能舉衆歸命。我為先容。而左右之。則君之福祿可保。而衆之性命亦可全也。張保猶豫未決。飛熊曰：識時務者為俊傑。昧先幾者非明哲。君與婆帶既相怨。則婆帶必將協同官軍。奮彼之怒。乘君之虛。以與君決一死戰。君其能保必勝乎。曩者一婆帶尚能勝君。況加之以官軍乎。官軍既勝。婆帶盡以君情輸之。則瀾洲。碇洲。君不得而據也。惠潮之商船。廣摩之水村。洋面之眾。船近海之田園。其

打單之所入。君不得而有也。打單既無。糧食遂缺。君衆何所依。以為命乎。智者防患於未然。愚者每悔於事後。若事後而悔。則悔之已無及也。君其早圖之。保乃與一嫂商酌。一嫂曰。周先生之言。亦極有理。保其從之可也。保謂飛熊曰。此事君能肩任否。曰。軍中豈戲言。若有不當。我不能以見一嫂。亦不能以見大人。君其釋疑。請率舟楫。虎門外沙角以聽命。保許焉。飛熊復命予。予之即報制軍。制軍憂賊之尚熾也。每欲完東路之賊。然後專辦西路。遂大喜。即檄紫泥司章予之。往探虛實。一嫂見予之。至令張保設饗相待。保具懇表曲。予之因留宿賊船。極言大人恩德。宜及時歸降。勿

至後悔。保喜。翌日與予之遍閱座船。命各頭領參謁。予之辭回。具言鄭石氏誠心歸命。且張保慷慨豁達。斷無虛假。制軍再令予之偕彭超往。商訂投降事宜。張保以留船數十。殺賊自贖。為請予之復命。制軍曰。如此。雖降猶未降耳。彼尚懷疑。懼我誘降。以執之也。吾當親往面諭之。